

始得西山宴游記

柳宗元

自予爲僇人居是州恒惴惴其隙也則施施而行漫漫而游日
與其徒上高山入深林窮迴溪幽泉怪石無遠不到到則披草
而坐傾壺而醉則更相枕以臥意有所極夢亦同趣覺而起起
而歸以爲凡是州之山有異態者皆我有也而未始知西山之
怪特今年九月廿八日因坐法華寺西亭望西山始指異之遂
命僕過湘江緣染溪斫榛莽焚茅茷窮山之高而止攀援而登
箕踞而坐則凡數州之土壤皆在衽席之下其高下之勢呀然
洼然若垤若穴尺寸千里攢蹙累積莫得遁隱縈青繚白外與
天際四望如一然後知是山之特出不與培塿爲類悠悠乎與
灑氣俱而莫得其涯洋洋乎與造物者游而不知其所窮引觴
滿酌頽然就醉不知日之入蒼然暮色自遠而至至無所見而
猶不欲歸心凝形釋與萬化冥合然後知吾嚮之未始游游於
是乎始故爲之文以志之

道藏輯要

天下名山記
湖廣始得柳

卷

軫集三